



UNIVERSITI
TEKNOLOGI
MARA

Cawangan Terengganu

INFO US\$AHAWAN

usahawan pemacu ekonomi mapan

EDISI
24
MAY 2021 APRIL 2022

NO ISSN: ISSN: ISSN 1823-6421

BULETIN ADALAH HAK MILIK KEKAL MASMED UITM CAWANGAN TERENGGANU

Celik Undang-Undang Usahawan: Pendaftaran Perniagaan

W Fatimah Hanun Binti Wan Mohamad Saferdin¹, Izyan Farhana Binti Zulkarnain¹ dan Ikhwan Naguib Bin Jusoh²

^{1,2}Fakulti Undang-Undang, Universiti Teknologi MARA Cawangan Sarawak, Kampus Samarahan ², Sarawak.

²Fakulti Undang-Undang, Universiti Teknologi MARA Cawangan Sarawak, Kampus Mukah, Sarawak.

Koresponden: hanun@uitm.edu.my

Usahawan yang berjaya adalah usahawan yang bijak merancang perniagaannya. Perancangan perniagaan yang rapi bermula seawal pemilihan entiti perniagaan yang akan dibentuk dan urusan pendaftarannya. Perlu diketahui bahawa pendaftaran perniagaan adalah amat penting bagi sesuatu perniagaan yang diusahakan. Seorang usahawan perlu celik undang-undang dan memahami kepentingan mendaftarkan perniagaan dan kesan jika tidak melakukannya. Terdapat empat jenis entiti perniagaan yang boleh dipilih oleh usahawan bagi memulakan perniagaan mereka iaitu milikan tunggal atau perkongsiaan, syarikat, perkongsiaan liabiliti terhad dan koperasi. Adalah menjadi tanggungjawab seorang usahawan untuk mendaftar perniagaan yang diusahakan tidak kira apa pun jenis entiti perniagaan yang dipilih.

Akta perundangan yang utama berkenaan pendaftaran perniagaan iaitu Akta Pendaftaran Perniagaan 1956 (APP 1956). Berdasarkan panduan yang dikeluarkan oleh Suruhanjaya Syarikat Malaysia (SSM), terdapat beberapa syarat-syarat mendaftarkan perniagaan. Pertama, berdasarkan seksyen 5 APP 1956, sesuatu perniagaan hendaklah didaftarkan tidak lewat dari 30 hari dari tarikh permulaan perniagaan tersebut. Kedua, perniagaan yang didaftarkan mestilah memenuhi seksyen 2 (taksiran perniagaan) APP 1956. Ketiga, pemilik atau rakan kongsi perniagaan hendaklah merupakan warganegara atau penduduk tetap dan mestilah berumur 18 tahun dan ke atas. Akhir sekali, perniagaan atau tempat utama perniagaan yang dijalankan mestilah beroperasi di semenanjung Malaysia dan Wilayah Persekutuan Labuan.



Suruhanjaya Syarikat Malaysia (SSM)
Sumber: <https://www.sterrific.com.my/blog/wp-content/uploads/2019/07/guide-1024x768.png>

Mengapakah pentingnya seseorang usahawan itu mendaftarkan perniagaannya? Mendaftarkan perniagaan adalah perlu bagi membuktikan perniagaan itu sebagai perniagaan yang sah dan diperakui oleh undang-undang melalui sijil pendaftaran yang dikeluarkan. Banyak kelebihan yang akan diperolehi jika perniagaan didaftarkan. Pendaftaran perniagaan dapat membantu kemajuan perniagaan itu sendiri di mana pengguna akan lebih yakin untuk berurusan dengan sesebuah perniagaan yang berdaftar dan sah. Selain itu, ia dapat membantu memudahkan pengguna membuat semakan dan mendapatkan maklumat mengenai perniagaan tersebut. Maklumat berkaitan dengan perniagaan dan pemilik akan direkodkan di dalam daftar perniagaan. Perniagaan yang berdaftar juga membolehkan ia menerima bantuan-bantuan atau inisiatif-inisiatif khas yang diperuntukkan oleh pihak kerajaan yang memberi manfaat kepada perniagaan tersebut.

Selain itu, perniagaan yang mendaftar membolehkan pemilik, pewaris, pentadbir atau mana-mana individu yang berhak terhadap harta pemilik tersebut untuk membuat tuntutan ke atasnya. Dengan mendaftarkan perniagaan juga, usahawan dapat membantu kerajaan merealisasikan perancangan dasar-dasar negara. Ini kerana rekod-rekod yang disimpan dan dikemaskini di SSM boleh dirujuk dan digunakan bagi penyediaan pelbagai laporan bagi meningkatkan kemajuan sektor ekonomi negara.

Terdapat kesan buruk jika usahawan tidak mendaftarkan perniagaan mereka. Seperti yang telah dinyatakan di bawah Seksyen 5 APP 1956, sesuatu perniagaan hendaklah didaftarkan tidak lewat dari 30 hari daripada tarikh permulaan perniagaan tersebut. Sekiranya individu telah menjalankan perniagaan tanpa pendaftaran, individu tersebut telah melakukan kesalahan di bawah APP 1956. Jika didapati bersalah, hukuman yang diperuntukkan oleh APP 1956 adalah hukuman denda tidak melebihi RM50,000 atau penjara tidak lebih daripada dua (2) tahun atau kedua-duanya. Selain itu, menurut Seksyen 8(1) APP 1956, hak di dalam sesuatu kontrak bagi orang yang mendakwa dirinya menjadi sekutu niaga berhubungan dengan perniagaan yang tidak didaftarkan tersebut, tidak boleh dikuatkuasakan melalui prosiding undang-undang samada atas nama perniagaan tersebut atau individu.



Pendaftaran Perniagaan Atas Talian

Sumber: [https://www.malaysia.gov.my/media/images/3-Mendaftar-Perniagaan-\(BM\).png](https://www.malaysia.gov.my/media/images/3-Mendaftar-Perniagaan-(BM).png)

Jelaslah pendaftaran perniagaan amatlah penting dan tidak harus dipandang ringan oleh usahawan yang ingin maju dalam perniagaan. Urusan pendaftaran kini lebih mudah dengan adanya sistem-sistem pendaftaran secara atas talian seperti EzBiz bagi perniagaan milikan tunggal atau pekongsiaan, MyCOID bagi syarikat, MyLLP bagi perkongsiaan terhad dan SKM Online bagi koperasi. Pendaftaran perniagaan kini berada diujung jari dan seharusnya tiada alasan lagi.

Rujukan

- [1] Akta Pendaftaran Perniagaan, 1956
- [2] Suruhanjaya Syarikat Malaysia, FAQ Apa Kelebihan Mendaftar Perniagaan Atas Talian Dengan SSM?, diakses pada 10 November 2021, <https://www.ssm.com.my/bm/Lists/FAQ/DispForm.aspx?ID=97>
- [3] MyGovernment, Mendaftar Perniagaan, diakses pada 10 November 2021, <https://www.malaysia.gov.my/portal/subcategory/18?language=my>
- [4] Panduan Pendaftaran Perniagaan Baru, Suruhanjaya Syarikat Malaysia (SSM)
- [5] SMEinfo, Panduan Proses Pendaftaran Perniagaan, diakses pada 10 November 2021, <<https://www.smeinfo.com.my/perniagaan-yang-sah/panduan-proses-pendaftaran-perniagaan/>>